

Sifilis, informacija za pacijente

Zašto ste dobili ovu informaciju?

Vi ste zaraženi ili se sumnja da ste zaraženi sifilisom. Ovdje ćete dobiti informacije o sifilisu, kako se liječi i šta trebate učiniti.

Šta je sifilis?

Sifilis je bolest uzrokovana bakterijom. Bakterije sifilisa mogu uzrokovati infekciju na sluznicama ili na koži u blizini genitalija, anusa ili usta. Bakterije mogu biti prisutne i u krvi. Sifilis može postojati u tijelu nekoliko godina bez da izaziva simptome.

Kako primjećujem da imam sifilis?

Mnogi zaraženi nemaju simptome.

Neki imaju ranice na, u ili blizu genitalija, anusa ili usta. Rana obično zacijeli nakon nekoliko sedmica. Neki dobiju osip po tijelu, a često i na dlanovima i tabanima.

Da li je sifilis opasan?

Ako se ne liječi, sifilis može uzrokovati ozbiljna oštećenja različitih organa.

Kako se prenosi sifilis?

Sifilis se prvenstveno prenosi nezaštićenim vaginalnim odnosom, analnim odnosom ili tokom oralnog seksa. Ako ste trudni, postoji rizik da možete zaraziti svoju bebu tokom trudnoće. Svim trudnicama se u ranoj trudnoći nudi testiranje na sifilis.

Sifilis je zarazan čak i kada osoba nema nikakve simptome. Neliječeni sifilis se prenosi seksualnim putem tokom prve godine nakon infekcije. Prijenos putem krvi i prijenos na dijete tokom trudnoće može se dogoditi više od godinu dana nakon trenutka infekcije.

Ne možete razviti imunitet na sifilis i stoga ga možete dobiti nekoliko puta.

Sifilis se **ne** prenosi preko odjeće, peškira ili toaleta.

Kako se sifilis liječi i koliko dugo ste zarazni?

Sifilis se liječi antibioticima (putem injekcija i/ili tableta). Infekcija će nestati ako uzimate lijek kako je propisano i slijedite savjete koje ste dobili. Tretman i posjeti ljekaru su besplatni. Ljekar procjenjuje koliko dugo ste zarazni, obično dok ne prođe sedmica dana nakon posljednje injekcije antibiotika.

Ako ste dobili vrijeme za kontrolnu posjetu, morate ponovo doći u prijamnu ambulantu. U većini slučajeva se novi uzorci krvi uzimaju nakon određenog broja mjeseci kako bi se provjerilo da li je infekcija nestala.

Da li se prilikom uzimanja uzorka vidi da ste imali sifilis?

Najčešće će se vidjeti da ste imali sifilis ako kasnije uradite test krvi na sifilis. Laboratorija će zatim izvršiti daljnje testove kako bi utvrdila da li ste ponovo zaraženi.

Na šta treba da mislite kako ne bi zarazili druge osobe?

Sifilis je opće opasna bolest prema Zakonu o zaštiti od zaraznih bolesti. Stoga se Vi koji bolujete od sifilisa ili se sumnja da imate sifilis morate pridržavati određenih pravila, takozvanih pravila ponašanja.

Pravila ponašanja

- Morate osobi sa kojom imate seks reći da imate/možda imate sifilis.
- Morate koristiti zaštitu (kondom) ako imate seksualne odnose prije nego što se liječenje/testiranje uzorka završi.
- Morate doći na kontrolu ako se od Vas to traži.

Ako ste dobili neko pravilo ponašanja za koje smatrate da je pogrešno, možete se obratiti ljekaru za zarazne bolesti u vašoj regiji.

Kada imate sifilis ne smijete rizikovati da nekoga zarazite. Najsigurnije je da nemate snošaj ili bilo koju drugu vrstu seksa dok Vam ljekar ne kaže da više nemate sifilis. To je obično sedmicu dana nakon posljednje injekcije antibiotika. Ako svejedno imate seks, morate reći osobi da imate sifilis i morate koristiti zaštitu (kondom).

Praćenje zaraze

Veoma je važno pronaći osobe koje boluju od sifilisa kako bi se mogle liječiti, dijelom kako bi se smanjio rizik od oštećenja (vidi gore), a dijelom kako bi se spriječilo širenje infekcije na više osoba.

Prema Zakonu o zaštiti od zaraznih bolesti, morate sudjelovati u praćenju zaraze. To znači da zdravstvenom osoblju morate pružiti informacije o tome s kim ste imali seks posljednjih godinu dana. Ponekad je potrebno dobiti informaciju i o još ranijem periodu.

Ono što ćete ispričati je povjerljivo (tajno) i osobe koje ćete navesti neće saznati ko ste Vi. Samo će im biti rečeno da se moraju testirati. Podaci također neće biti upisani u Vaš medicinski karton, već u poseban, takozvani dokument za praćenje zarazne bolesti.

Više informacija

Više informacija o sifilisu se nalazi na 1177, Youmo (za Vas koji ste stari između 13 i 20 godina i želite informaciju na drugom jeziku) i UMO (online prijemna ambulanta za mlade).

www.1177.se



www.youmo.se



www.umo.se



O brošuri za prevenciju zaraznih bolesti

Brošuru za prevenciju zaraznih bolesti sastavlja Švedsko udruženje regionalnih medicinskih službenika i primjenjuje se na nacionalnom nivou.